



*Preziai geniturs, preziai interessai,*

sunter 3 onns signai da pandemias ed uia da buca bia pli da rapportar - pudess'ins forsa tertgar. Mo las problematicas globalas paran buca d'anflar ina fin. Problematicas globalas tuccan buca il menaschi quotidian d'ina scola sco il Consorzi - pudess'ins tertgar vinavon. Mo era cheu stoss'jeu trumpar: la crisa d'energia pretenda sco la pandemia da Corona e l'uiara ell'Ucraina era dil Consorzi il siu. Las pegnas en las localitads da scola ein vegnidas sbassadas per spagnar energia. D'ina decoraziun d'advent cun illuminaziun vegn desistiu. Differentas mesiras preliminaras ein vegnidas instradadas ni preparadas pil cass dils cass.

Secapescha, nus tschintschein cheu da mesiras fetg mudestas en cumparegliazion cun auters loghens ni instituziuns - selamentar sin ault level savess'ins gi. Mo tgi vess detg aunc avon buca daditg, tgei temps da crisa che nos affons ston passentar?

Il Consorzi emprova da possibilitar als affons ton normalitad sco pusseivel. Aschia eis ei bi da veser che las localitads da scola ein tuttina embellidas cun decoraziun da Nadal semplamein senza illuminaziun.

Apropos: savevas vus ch'ei dat mintg'onn ina decoraziun da Nadal en nossas casas da scola?

Ni ch'ei dat mintg'onn d'advent sentupadas d'advent per tuts scolars? Ina pintga investa da tgei ch'ei dat schiglioc aunc el Consorzi sper l'instrucziun anfleis vus sin las proximas paginas.

Jeu giavischel a Vus geniturs ed a nos scolars ina benedida e pascheivla fiasta da Nadal ed ina buna entschatta egl onn niev!

Salids cordials

Erica Cavegn-Pfister

*Presidenta dil Cussegl da scola*



*Decoraziun d'advent scola Trun*

*P.s.: Era jeu selubeschel da far entgins gis vacanzas denter Nadal e Daniev - aschia sundel buca contonschibla dils 24-12 entochen ils 9-1. En cass urgents scrivi in messadi per sms ni whatsapp!*

# CONSORZI DA SCOLA SUMVITG-TRUN



## NOVITADS DA SCOLA

## ACTUALITADS

### Abdicaziuns el Consorzi

(ecp) Sin la fin digl onn calendaric ha il Consorzi stuiu prender encunter differentas abdicaziuns.

- *Armon Bearth* (persuna d'instrucziun da classa, scalem superiur) va en pensiun cun la fin digl onn da scola current e quei suenter varga 40 onns survetsch el scolaesser.
- *Regina Giger* (pedagoga curativa) entscheiva il proxim onn da scola a Mustér ella scola populara sco pedagoga curativa.
- *Era Gionina Spescha* (persuna d'instrucziun da classa, 5./6. classa Rabius) mida a Mustér e surpren leu la 5. e 6. classa primara.
- *Alissia Marino* (persuna d'instrucziun da classa, 1. classa Trun) tuorna a Tujetsch ed ei engaschada navend'il proxim onn da scola a Sedrun.

Las plazzas vacantas che seresultan ord questas abdicaziuns ein gia vegnidas publicadas e nus luvrein intensivamein vid la reoccupaziun da talas. La munconza da persunal adequat ei denton era da sentir en las scolas, aschia ch'ei vegn a duvrar siu temps entochen che nus savein comunicar dapli.

### Iert da scola - finiu da cavar truffels

(ecp) Il 2018 ei il project "Iert da scola" vegnius mess sin peis. Cun sustegn dil WWF e dall'Academia Vivian han ils affons dalla 5. e 6. classa da Trun mintgamai astgau luvrar vid ed egl iert - las novitads da scola han gia reportau digl iert. Uss va quei project denton a fin. La Viafier Retica reconstruescha la staziun a Trun ed igl iert che sesanfla sin territori dalla VR sto far plaz per in niev baghetg. Nus schein engraziel per igl engaschi da tuttas persunas involucadas e tgisà - forsa sesanfla in niev project da scola!

### Crisa d'energia - tuts ein dumandai

(ecp) La situaziun actuala d'electricidad e da gas fatschenta. L'energia daventa scarsa - era en il cantun Grischun. Igl Uffeci per la scola populara ed il sport ha creau aposta per quella tematica ina pagina d'internet cun las informaziuns pil mument impurtontas. Plinavon han las direcziuns da scola survegniu in scriver da cusseglier guvernativ Dr. Jon Domenic Parolini en caussa, che supplichescha las instituziuns far empremas ponderaziuns e sepreparar per il cass d'ina interrupziun dil current electric. Tgei ch'ei pil mument segir: l'instrucziun ha liug en mintga cass. Adattaziuns digl urari ein pusseivlas, denton vegn la scola buca a curdar o.

Il Consorzi ha fatg differentes sclariments, priu certas mesiras ed elaborau in feagl d'informaziun per tuttas famiglias e tuts involvai el Consorzi. Quest feagl vegn distribuius a tuts ed ei era d'anflar sin nossa pagina d'internet.

### Structuras dil gi supplementaras - nova purschida

(ecp) Dapi quest atun porscha il Consrozi en collaboraziun cun la canorta Lumpazi Mustér structuras dil gi supplementaras. Quest onn da scola vala quella purschida per gliendisgis e gievgia sur miezgi (meisa da gentar) e gievgia suentermiezgi. Tut tenor basegns vegn la purschida adattada il proxim onn da scola. Affons san vegnir annunziati mintgamai sin l'entschatta d'in semester per las structuras dil gi. Sche Vus haveis damondas, s'annunziei nunschenadamein tier l'administraziun!

# CONSORZI DA SCOLA SUMVITG-TRUN



## NOVITADS DA SCOLA

### Il Consorzi se presenta: Erica Cavegn-Pfister - presidenta dil Cussegl da scola



(ecp) Il 2017 sundel jeu vegnida elegida sco geraua per la vischnaunca da Trun. Suenter haver giu surpriu il departament da scola ha ei buca cuzzau ditg ch'jeu hai era astgau surpender il presidi dil Cussegl da scola. Buca ch'jeu havess encuretq quei post - magari pren nossa via denton stortas che nus vein buca previu. El dentertemps sundel sevidida en schibein el menaschi da scola, sco era al tgamun dil Cussegl da scola - ed jeu fetschel fetg bugen quella lavur.

Il Consorzi schai a mi a cor ed jeu sundel premurada da menar quel ensemen cun tuts involvai sin ina buna via en in futur empermettent. Svilup dil menaschi, collaboraziun e collegialitad, stema e respect vicendeivel ein mes pli impurtonts pilasters da mia lavur.

Privat stundel jeu cun miu um e mes 3 affons (6, 4 ed 1 onn) a Schlans, nua ch'jeu sundel era carschida si. Suenter 11 onns ella bassa, empleni da studis e lavur denter auter ella biblioteca dalla ETH Turitg ha la patria clamau ed jeu sundel suandada quei clom. La lavur en vischnaunca ed aschia era en scola dat a mi igl equiliber ch'jeu drovel sper la famiglia. Jeu lavurel bugen vid in caussa sch'jeu sai s'engaschar e sch'jeu sai esser cun tgau e cor vidlunder. L'auter onn ein puspei elecziuns a Trun - ed jeu tegn, jeu stess bugen vinavon.

### Il Consorzi se presenta: Leci Jacomet - pdi da classa e meinapartiziun PR



(lj) Uonn dundel jeu il 20.onn scola cheu a Rabiis. Avon hai jeu instruiu 10 onns a Falera. Leu ed era all'entschatta a Rabiis hai jeu partiu il pensum cun mia dunna Barbara. Dapi in onn sun meinapartiziun dalla scola da Rabiis.

La scola ei in liug d'emprander e da convivenza che sebase sin stema e respect. Per mei eis ei impurtont da crear in clima ed in ambient el qual tuttas persunas san sesviluppar risguardond ils differents basegns dils cumpigliai. Ina gronda sfida quotidiana. La premissa per dar damogn a quella sfida ei la relaziun. Ina relaziun pretenda temps e pazienza. Mia finamira ei da promover la persunalitad e las fermezas da mintg'affon e sustener el en sias fleivlezas per che mintg'affon daventi fermes.

La gronda sfida da promover mintg'affon e mussar ad el da respectar ils conscolars e las conscolaras pretend'era in bien spért enteifer la cudria dallas persunas d'instrucziun. Perquei eis ei evident che nus organisain era dis da projects (sco nus fagein per exempel mintg'onn el temps d'advent) enteifer la scola per promover la convivenza ed aschia era in bien spért sur las classas ora. Quei evitescha era problems disciplinars. L'activitad da nanins che nus fagein enteifer la cudria dallas persunas d'instrucziun promova il bien spért da cudria. Jeu sun leds da saver quintar cun igl agid ed engaschi dallas persunas d'instrucziun ella cudria da Rabiis. Cun quella caschun less engraziar ad ellas per lur grond engaschi en favur dil beinesser e dalla promoziun da mintg'affon ed era per la buna collaboraziun ed il sustegn.

Ju sun carschius si ainta Sedrun e vivel dapi 20 onns cun mia famiglia cheu a Rabiis. Nos affons ein gia carschi.

# CONSORZI DA SCOLA SUMVITG-TRUN



NOVITADS DA SCOLA

TEMATICA

## Activitads da scola - savevas vus che...

(ecp) El Consorzi astgan ils scolars e las scolaras viver activitads multifaras. Buca mo l'instrucziun en stanza quenta, era il communabel duei haver in plaz. Perquei, savevas vus che...



..ils scolarets da scoletta han survegnan aposta pils viadis capetschas colluradas?



..las casas da scola vegnan embelidas mintgamai igl advent da decoraziuns marvegliusas entras ils scolars?



..las classes superiuras s'engaschan onn per onn cun lavur cumina pil generaleesser (e per la cassa da classa :-)?



..il parlament da scolars astga ir sin viadi sco paga per lur engaschi?



..ils scolars da Rabius decoreschan adina puspei da niev lur casa da scola?




..ina carretta sa esser part dil gi da sport?



..il Sontgaclau viseta mintg'onn ils scolarets da scoletta?



..ils 3. Sogns Retgs ein en verdad scolars dil Consorzi?



..la superiura vegn sensibilisada a moda activa als gis annuals da prevenziun?



..ils scolars astgan guder gis da sport d'unviern?



..ei dat mintg'onn s'entupadas d'advent per tuts?



..ins anfla dapli che mo cudischs en biblioteca?

# CONSORZI DA SCOLA SUMVITG-TRUN



## NOVITADS DA SCOLA

## INFORMAZIUNS

### Termins

16-20 da schaner	scola da skis scoletta
11 da fevrer	til da tscheiver Trun
24 da fevrer	turnier da notg (SUP)
27 da fevrer-3 da mars	vacanzas da sport
28 da mars	di da prevenziun (SUP)
7-10 d'avrel	Pastgas
24-28 d'avrel	vacanzas da primavera
18-19 da matg	Anceinza (affons han liber)
29 da matg	Tschuncheismas (affons han liber)
8 da zercladur	Sontgilcrest (affons han liber)



### Contacts

Ils meinapartiziuns ein contonschibels suandontamein:

- *Salvatore Staglianò*  
gliendisgis dallas 15:00 - 16:00 uras telefontamein sut 081 936 33 04,  
ni adina per mail [sup.meinapartiziun@scolasumvitgtrun.ch](mailto:sup.meinapartiziun@scolasumvitgtrun.ch)
- *André Walther*  
gliendisgis dallas 15:00 - 16:00 uras telefontamein sut 081 936 33 04,  
ni adina per mail [pt.meinapartiziun@scolasumvitgtrun.ch](mailto:pt.meinapartiziun@scolasumvitgtrun.ch)
- *Leci Jacomet*  
gliendisgis dallas 15:00 - 16:00 uras telefontamein sut 081 943 17 11,  
ni adina per mail [pr.meinapartiziun@scolasumvitgtrun.ch](mailto:pr.meinapartiziun@scolasumvitgtrun.ch)

L'administraziun dil Consorzi da scola anfleis Vus ella casa da scola a Trun. Las uras da spurtegl ein per regla sco suonda:

gliendisgis: 08:00 - 12:00 e 13:30-16:00

gievgia: 08:00 - 12:00 e 13:30-16:00

Tier absenzas da scolars muort maldispostadads astgeis Vus bugen tschintschar a nus sin pindella sut il numer 081 936 33 04.

**Las proximas novitads da scola cumparan il zercladur!**